

Na osnovu člana 3. stav 2. i člana 16. stav 1. Zakona o Vladi Zeničko-dobojskog kantona–  
Prečišćeni tekst („Službene novine Zeničko-dobojskog kantona“, broj 7/10), na prijedlog  
Ministarstva za privredu, Vlada Zeničko-dobojskog kantona, na 131. sjednici, održanoj dana  
30.10.2013. godine, d o n o s i

## **UREDBU**

### **O VRŠENJU OVLAŠTENJA ORGANA ZENIČKO-DOBOJSKOG KANTONA U PRIVREDNIM DRUŠTVIMA SA UČEŠĆEM DRŽAVNOG KAPITALA**

#### **DIO PRVI – OSNOVNE ODREDBE**

##### **Član 1.** **(Predmet)**

Ovom uredbom uređuje se vršenje ovlaštenja po osnovu učešća državnog kapitala u  
privrednim društvima u kojim ova ovlaštenja vrši Vlada Zeničko-dobojskog kantona, neposredno ili  
putem kantonalnih organa uprave ili putem kantonalnih upravnih organizacija (u daljnjem tekstu:  
organi Kantona).

##### **Član 2.** **(Lista privrednih društava)**

Privredna društva u kojima Zeničko-dobojski kanton vrši ovlaštenja iz člana 1. ove Uredbe po  
osnovu državnog kapitala (u daljem tekstu: Lista) su:

- a) „VELEPROMET-MALOPRODAJA“ d.o.o. Visoko, sjedište Visoko, putem Ministarstva za  
privredu,
- b) „RMK-PROMET ZENICA“ d.d. Zenica, sjedište Zenica, putem Ministarstva za privredu,
- c) „NOVA TRGOVINA“ d.d. Žepče, sjedište Žepče, putem Ministarstva za privredu,
- d) „ŠUMSKO PRIVREDNO DRUŠTVO ZENIČKO-DOBOJSKOG KANTONA“ d.o.o.  
Zavidovići, sjedište Zavidovići, putem Ministarstva za poljoprivredu, šumarstvo i  
vodoprivredu,
- e) „ŽGP“ d.d. Zenica, sjedište Zenica, putem Ministarstva za prostorno uređenje, promet i  
komunikacije i zaštitu okoline,
- f) „NATRON“ d.d. Maglaj, sjedište Maglaj, putem Ministarstva za privredu.

#### **DIO DRUGI – UČESTVOVANJE U RADU I ODLUČIVANJU SKUPŠTINA PRIVREDNIH DRUŠTAVA SA UČEŠĆEM DRŽAVNOG KAPITALA**

##### **Član 3.** **(Punomoćnik za skupštinu)**

Pravo učestvovanja u radu i odlučivanju na skupštini privrednih društava sa učešćem državnog  
kapitala (u daljem tekstu: privredna društva) organi Kantona ostvaruju putem punomoćnika koji je u  
svemu dužan postupati u skladu sa dobijenim obavezujućim uputstvima organa Kantona koji vrši  
ovlaštenja po osnovu učešća državnog kapitala u tom privrednom društvu.

#### **Član 4.**

##### **(Zaključak o učestvovanju u radu i odlučivanju skupština)**

Vlada Zeničko-dobojskog kantona, na prijedlog organa Kantona koji vrši ovlaštenja po osnovu učešća državnog kapitala u tom privrednom društvu, donosi zaključak kojim:

- a) imenuje punomoćnika za skupštinu privrednog društva,
- b) utvrđuje način glasanja po svakoj pojedinoj tački dnevnog reda, tako da pored svake tačke dnevnog reda mora izričito biti navedeno: „glasati za“ ili „glasati protiv“ ili „biti suzdržan“ ili drugi odgovarajući način glasanja,
- c) utvrđuje druga odgovarajuća obavezujuća uputstva koja se odnose na sazivanje skupštine, učestvovanje u raspravi, predlaganje i glasanje za skidanje pojedinih tačaka sa dnevnog reda, predlaganje i glasanje za odgađanje skupštine.

#### **Član 5.**

##### **(Punomoć za skupštinu)**

Organ Kantona koji pravo učestvovanja u radu i odlučivanju skupštine privrednog društva ostvaruje putem punomoćnika, za svaku sazvanu skupštinu, a u skladu sa zaključkom iz člana 4. ove Uredbe, punomoćniku daje punomoć u pisanoj formi, koja obavezno sadrži:

- a) naziv i sjedište davaoca punomoći/organa Kantona koji putem punomoćnika ostvaruje ovlaštenja u radu i odlučivanju skupštine privrednog društva,
- b) ime i prezime punomoćnika, ime jednog roditelja, adresa stanovanja, JMB, broj lične karte i naziv organa koji je izdao ličnu kartu,
- c) dnevni red sazvane skupštine,
- d) naznaku da je punomoćnik obavezan postupati u skladu sa uputstvima Vlade Zeničko-dobojskog kantona utvrđena zaključkom iz člana 4. ove Uredbe,
- e) naznaku da punomoćnik nema ovlaštenje da učestvuje u radu i odlučivanju sazvane skupštine izvan tačaka dnevnog reda navedenog u punomoći,
- f) broj, mjesto i datum izdavanja punomoći,
- g) potpis punomoćnika i
- h) potpis rukovodioca organa Kantona i pečat organa Kantona.

#### **Član 6.**

##### **(Dostavljanje poziva za Skupštinu)**

Privredno društvo dužno je naredni dan od dana objavljivanja obavještenja o održavanju skupštine organu Kantona koji u skladu sa Listom vrši ovlaštenja po osnovu učešća državnog kapitala u tom privrednom društvu dostaviti poziv i obavještenje za zakazanu skupštinu sa dnevnim redom, a najkasnije 15 dana prije dana održavanja skupštine dostaviti materija za svaku tačku dnevnog reda.

#### **Član 7.**

##### **(Dostavljanje prijave i punomoći za Skupštinu)**

- (1) Prijava i punomoć za učešće u radu i odlučivanju skupštine društva dostavlja se privrednom društvu putem pošte, faksa ili elektronske pošte, najkasnije u roku koji je statutom ili odlukom društva utvrđen za registraciju dioničara za učešće u radu skupštine.
- (2) Punomoćnik je dužan originalni primjerak punomoći predati nadležnom organu privrednog društva, najkasnije neposredno prije početka skupštine.
- (3) Ukoliko punomoć ne sadrži bilo koji dio obaveznog sadržaja iz člana 5. tačka a) do h) ove Uredbe punomoćnik ne može učestvovati u radu i odlučivanju skupštine.

#### **Član 8.**

##### **(Opoziv punomoći)**

- (1) Organ Kantona koji je dao punomoć za učestvovanje u radu i odlučivanju skupštine privrednog društva, može izuzetno opozvati punomoć ili umjesto već date punomoći dati novu punomoć najkasnije do održavanja skupštine.

- (2) Ukoliko organ Kantona, u roku od sedam dana od dana održane skupštine, privrednom društvu dostavi akt kojim pobija valjanost punomoći na osnovu koje je punomoćnik učestvovao u radu i odlučivanju skupštine, nadležni organ privrednog društva će proglasiti nevažećim glasove po osnovu te punomoći i o tome pismeno obavijestiti sazivača skupštine.
- (3) Sazivač skupštine je dužan obustaviti od izvršenja odluku za čije donošenje su bili odlučujući glasovi po osnovu punomoći iz stava (2) ovog člana i sazvati skupštinu radi ponovnog odlučivanja o tim pitanjima, najkasnije 30 dana od dana prijema obavještenja nadležnog organa privrednog društva.

## **DIO TREĆI – PREDLAGANJE, IZBOR, IMENOVANJE I RAZRIJEŠENJE ČLANOVA NADZORNIH ODBORA PRIVREDNIH DRUŠTAVA**

### **Član 9.**

#### **(Predlaganje, izbor i imenovanje članova nadzornih odbora)**

- (1) Izbor kandidata za imenovanje članova nadzornih odbora ispred državnog kapitala vrši se u skladu sa odredbama Zakona o ministarskim, vladinim i drugim imenovanjima Federacije Bosne i Hercegovine („Službene novine Federacije BiH“, broj: 12/03, 34/03 i 65/13).
- (2) Postupak iz stava (1) ovog člana provodi komisija imenovana od organa Kantona koji u skladu sa Listom vrši ovlaštenja po osnovu učešća državnog kapitala u tom privrednom društvu.
- (3) Komisija iz stava (2) ovog člana, nakon okončanog postupka izbora sačinjava listu najuspješnijih kandidata, na osnovu koje rukovodilac organa Kantona koji u skladu sa Listom vrši ovlaštenja po osnovu učešća državnog kapitala u tom privrednom društvu, Vladi Zeničko-dobojskog kantona upućuje prijedlog za utvrđivanje prijedloga kandidata za članove nadzornog odbora ispred državnog kapitala.
- (4) U skladu sa prijedlogom koji utvrdi Vlada Zeničko-dobojskog kantona, imenovanje članova nadzornih odbora ispred državnog kapitala vrši skupština privrednog društva.

### **Član 10.**

#### **(Imenovanje članova nadzornih odbora na kraći period)**

- (1) Izuzetno, bez provođenja postupka iz člana 9. ove Uredbe, Vlada Zeničko-dobojskog kantona, na prijedlog rukovodioca organa Kantona koji u skladu sa Listom vrši ovlaštenja po osnovu učešća državnog kapitala u tom privrednom društvu, može utvrditi prijedlog kandidata za članove nadzornog odbora ispred državnog kapitala koji se imenuju na kraći period, a u skladu sa odredbama Zakona o ministarskim, vladinim i drugim imenovanjima Federacije Bosne i Hercegovine („Službene novine Federacije BiH“, broj: 12/03, 34/03 i 65/13).
- (2) U skladu sa prijedlogom kandidata iz stava (1) ovog člana, imenovanje članova nadzornih odbora ispred državnog kapitala vrši skupština privrednog društva na period utvrđen Zakonom o ministarskim, vladinim i drugim imenovanjima Federacije Bosne i Hercegovine („Službene novine Federacije BiH“, broj: 12/03, 34/03 i 65/13), počev od dana stupanja na snagu odluke skupštine o imenovanju članova nadzornog odbora.

### **Član 11.**

#### **(Ograničenja za članstvo u nadzornom odboru)**

- (1) Za člana nadzornog odbora privrednog društva ispred državnog kapitala ne može biti predloženo ili imenovano lice:
  - a) za čiji izbor i imenovanje postoje smetnje i ograničenja utvrđene važećim propisima koji regulišu ovu oblast i
  - b) koje je zaposlenik tog privrednog društva, osim u slučaju kada Vlada Zeničko-dobojskog kantona utvrdi da je to od posebnog interesa za određeno privredno društvo, a što zavisi od djelatnosti koju privredno društvo obavlja.
- (2) Aktom o osnivanju i/ili statutom privrednog društva sa učešćem državnog kapitala mogu biti utvrđena i dodatna ograničenja za članstvo u nadzornom odboru tog privrednog društva.

## **Član 12.**

### **(Obaveze člana nadzornog odbora)**

Član nadzornog odbora imenovan ispred državnog kapitala dužan je:

- a) prije održavanja sjednice tog organa pribaviti obavezujuće mišljenje organa Kantona, ako taj organ razmatra izvještaj uprave o poslovanju po polugodišnjem i godišnjem obračunu, sa bilansom stanja i bilansom uspjeha i izvještajem revizije, predlaže raspodjelu i način upotrebe dobiti i način pokrića gubitka, odobrava kupovinu, prodaju, zamjenu, uzimanje u lizing i druge transakcije imovinom, direktno ili posredstvom supsidijarnih društava u toku poslovne godine u obimu od 15% do 33% knjigovodstvene vrijednosti ukupne imovine dioničkog društva, odobrava emisiju novih dionica postojeće klase u iznosu do trećine zbira nominalne vrijednosti postojećih dionica i određuje iznos, vrijeme prodaje i cijenu ovih dionica, koja ne može biti manja od prosječne tržišne vrijednosti postojećih dionica iste klase u 30 uzastopnih dana prije dana donošenja odluke, izbor i razrješenje predsjednika nadzornog odbora, izbor i razrješenje članova uprave društva,
- b) postupati u skladu sa obavezujućim uputstvima organa Kantona koji u skladu sa Listom vrši ovlaštenja po osnovu učešća državnog kapitala u tom privrednom društvu, a ako uputstva nije dobio, u skladu sa razumnom procjenom najboljeg interesa državnog kapitala i
- c) redovno, a najmanje jednom u tri mjeseca, dostaviti pismeni izvještaj o radu nadzornog odbora organu Kantona koji u skladu sa Listom vrši ovlaštenja po osnovu učešća državnog kapitala u tom privrednom društvu.

## **Član 13.**

### **(Pribavljanje mišljenja i uputstva)**

Pribavljanje mišljenja i uputstva iz člana 12. ove uredbe vrši se pismeno najkasnije sedam dana prije održavanja sjednice nadzornog odbora, a u izuzetnim slučajevima, ako se to ocijeni opravdanim, usmenim putem.

## **Član 14.**

### **(Razrješenje dužnosti prije isteka mandata članova nadzornih odbora)**

- (1) Razrješenje dužnosti prije isteka mandata članova nadzornih odbora privrednih društava imenovanih ispred državnog kapitala vrši skupština privrednog društva na osnovu zaključka iz člana 4. ove uredbe.
- (2) Članu nadzornog odbora koji je imenovan umjesto razriješenog člana, kada se ne razrješava cijeli nadzorni odbor, mandat traje do isteka mandata članova nadzornog odbora koji su imenovani prilikom imenovanja cijelog nadzornog odbora, a nisu razriješeni.

## **Član 15.**

### **(Podnošenje ostavke)**

- (1) Član nadzornog odbora može, prije isteka mandata, podnijeti ostavku na mjesto člana nadzornog odbora.
- (2) Član nadzornog odbora ostavku iz stava (1) ovog člana deponuje nadzornom odboru privrednog društva.
- (3) Nadzorni odbor privrednog društva obavezan je u roku od 8 dana o podnešenoj ostavci obavijestiti organ Kantona koji vrši ovlaštenja po osnovu učešća državnog kapitala u tom privrednom društvu.

## **Član 16.**

### **(Primopredaja dužnosti člana nadzornog odbora)**

Član nadzornog odbora imenovan ispred državnog kapitala, kojem je mandat istekao ili je razriješen dužnosti prije isteka mandata, dužan je izvršiti primopredaju dužnosti u roku i na način kako je to utvrđeno aktom organa Kantona ili aktom skupštine tog privrednog društva.

## **DIO ČETVRTI – DAVANJE SAGLASNOSTI ZA IMENOVANJE ČLANOVA UPRAVA PRIVREDNIH DRUŠTAVA I RAZRJEŠENJE DUŽNOSTI PRIJE ISTEKA MANDATA ČLANOVA UPRAVA PRIVREDNIH DRUŠTAVA SA VEĆINSKIM UČEŠĆEM DRŽAVNOG KAPITALA**

### **Član 17.**

#### **(Prethodna saglasnost i izbor članova uprava)**

- (1) Izbor kandidata za članove uprave privrednih društava sa većinskim učešćem državnog kapitala vrši organ utvrđen statutom tog privrednog društva (u daljnjem tekstu: nadležni organ) na osnovu objavljenog javnog konkursa u skladu sa uslovima utvrđenim zakonom i statutom privrednog društva.
- (2) Nakon okončanog postupka izbora kandidata u skladu sa stavom (1) ovog člana članovi nadležnog organa ispred državnog kapitala sačinjavaju i dostavljaju listu najuspješnijih kandidata organu Kantona koji vrši ovlaštenja po osnovu učešća državnog kapitala u tom privrednom društvu.
- (3) Vlada Zeničko-dobojskog kantona, na prijedlog organa Kantona iz stava (2) ovog člana, donosi zaključak o davanju prethodne saglasnosti za imenovanje članova uprave.
- (4) U skladu sa zaključkom Vlade Zeničko-dobojskog kantona kojom je data prethodna saglasnost za imenovanje članova uprave, nadležni organ društva sa većinskim učešćem državnog kapitala donosi odluku o imenovanju članova uprave.

### **Član 18.**

#### **(Imenovanje vršilaca dužnosti članova uprave)**

- (1) Izuzetno, bez provođenja postupka iz člana 15. ove Uredbe, Vlada Zeničko-dobojskog kantona, na prijedlog rukovodioca organa Kantona koji u skladu sa Listom vrši ovlaštenja po osnovu učešća državnog kapitala u tom privrednom društvu, može donijeti zaključak o davanju prethodne saglasnosti za imenovanje vršilaca dužnosti članova uprave privrednog društva sa većinskim učešćem državnog kapitala na period do šest mjeseci.
- (2) U skladu sa zaključkom Vlade Zeničko-dobojskog kantona iz stava (1) ovog člana, nadležni organ društva sa većinskim učešćem državnog kapitala donosi odluku o imenovanju vršilaca dužnosti članova uprave na period do šest mjeseci, počev od dana stupanja na snagu odluke nadležnog organa o imenovanju vršilaca dužnosti članova uprave.

### **Član 19.**

#### **(Razrješenje dužnosti prije isteka mandata članova uprave)**

- (1) Razrješenje dužnosti prije isteka mandata članova uprave privrednih društava sa većinskim učešćem državnog kapitala vrši nadležni organ privrednog društva na osnovu prethodne saglasnosti Vlade Zeničko-dobojskog kantona.
- (2) Članu uprave privrednog društva, izuzev predsjednika uprave, koji je imenovan umjesto razrješenog člana, u slučaju kada se ne razrješava cijela uprava privrednog društva, mandat traje do isteka mandata predsjednika uprave privrednog društva.
- (3) Razrješenjem dužnosti predsjednika uprave razrješavaju se dužnosti svi članovi uprave.

### **Član 20.**

#### **(Primopredaja dužnosti člana uprave)**

Član uprave privrednog društva sa većinskim učešćem državnog kapitala kojem je mandat istekao ili je razriješen dužnosti prije isteka mandata dužan je izvršiti primopredaju dužnosti u roku i na način kako je to utvrđeno aktom organa Kantona ili aktom nadzornog odbora tog privrednog društva.

## **DIO PETI – KAZNENE ODREDBE**

### **Član 21.**

#### **(Novčane kazne za privredno društvo)**

- (1) Za prekršaj kaznit će se novčanom kaznom u iznosu od 500,00 KM do 7.000,00 KM privredno društvo u kojem ovlaštenja po osnovu učešća državnog kapitala vrše organi Kantona koje ne dostavi poziv za zakazanu skupštinu sa dnevnim redom i materijalima za svaku tačku dnevnog reda u skladu sa članom 6. ove Uredbe.
- (2) Za prekršaj iz stava (1) ovog člana kaznit će se i odgovorno lice u privrednom društvu novčanom kaznom u iznosu od 50,00 KM do 2.000,00 KM.

### **Član 22.**

#### **(Novčane kazne za člana nadzornog odbora)**

- (1) Za prekršaj kaznit će se novčanom kaznom u iznosu od 50,00 KM do 2.000,00 KM član nadzornog odbora privrednog društva u kojem ovlaštenja po osnovu učešća državnog kapitala vrše organi Kantona, imenovan ispred državnog kapitala, koji:
  - a ) postupi protivno članu 12. ove Uredbe,
  - b) ne izvrši primopredaju dužnosti u skladu sa članom 16. ove Uredbe.
- (2) Za prekršaj kaznit će se novčanom kaznom u iznosu od 50,00 KM do 2.000,00 KM član nadležnog organa privrednog društva u kojem ovlaštenja po osnovu većinskog učešća državnog kapitala vrše organi Kantona, imenovan ispred državnog kapitala, koji glasa za razrješenje i imenovanje članova uprave bez pribavljene prethodne saglasnosti Vlade Zeničko-dobojskog kantona iz članova. 17., 18. i 19. ove Uredbe.

### **Član 23.**

#### **(Novčane kazne za člana uprave)**

Za prekršaj kaznit će se novčanom kaznom u iznosu od 50,00 KM do 2.000,00 KM član uprave privrednog društva sa većinskim učešćem državnog kapitala koji ne izvrši primopredaju dužnosti u skladu sa članom 20. ove Uredbe.

## **DIO ŠESTI – SLUŽBENA EVIDENCIJA**

### **Član 24.**

#### **(Službena evidencija)**

- (1) Organ Kantona obavezan je voditi službenu evidenciju o podacima koji se odnose na nadzorne odbore i uprave za privredna društava u kojima u skladu sa Listom vrši ovlaštenja po osnovu učešća državnog kapitala.
- (2) Organi Kantona koji u skladu sa stavom (1) ovog člana vode službene evidencije o podacima koji se odnose na nadzorne odbore i uprave privrednih društava, evidentiranje prvog sastava i evidentiranje svakog novog imenovanja i razrješenja članova nadzornih odbora i uprava ovih privrednih društava mogu vršiti isključivo na osnovu odgovarajućeg akta Vlade Zeničko-dobojskog kantona iz članova 9., 10., 14., 17., 18. i/ili 19 i drugih potrebnih dokumenata.

## **DIO SEDMI – PRELAZNE I ZAVRŠNE ODREDBE**

### **Član 25.**

#### **(Nadzor)**

Nadzor nad provođenjem ove Uredbe vrše organi Kantona koji u skladu sa Listom vrše ovlaštenja u privrednim društvima sa učešćem državnog kapitala, svako u okviru svojih ovlaštenja.

**Član 26.**  
**(Usklađivanje akata)**

Privredna društva u kojim ovlaštenja po osnovu učešća državnog kapitala vrše organi Kantona dužna su uskladiti odredbe statuta sa ovom Uredbom u roku od 60 dana od dana stupanja na snagu ove Uredbe.

**Član 27.**  
**(Prestanak važenja)**

Stupanjem na snagu ove uredbe prestaje da važi Uredba o vršenju ovlašćenja organa Zeničko-dobojskog kantona u privrednim društvima sa učešćem državnog kapitala i Lista privrednih društava u kojima Zeničko-dobojski kantona vrši ovlašćenja po osnovu državnog kapitala („Službene novine Zeničko-dobojskog kantona“, broj 5/06 i 4/07).

**Član 28.**  
**(Stupanje na snagu)**

Ova Uredba stupa na snagu narednog dana od dana objavljivanja u „Službenim novinama Zeničko-dobojskog kantona“.

Broj: 02-\_\_\_\_\_ /13.

Datum, 30.10.2013. godine

Z e n i c a

**PREMIJER**

*Munib Husejnagić, dipl.ing.maš.*

DOSTAVLJENO:

1x Ministarstvo za privredu,

1x „Službene novine Zeničko-dobojskog kantona“,

1x a/a.